

Malaysia perlu bina kekuatan dalaman hadapi cabaran

Dengkil: Malaysia perlu membina kekuatan dalaman yang ketika ini menjadi keperluan mendesak sebagai langkah menghadapi dunia yang semakin mencabar dan penuh ketidakpastian, selain memainkan peranan memberi penguatkuasaan semula kekuatan ASEAN, kata Datuk Seri Anwar Ibrahim.

Perdana Menteri berkata, kerajaan kini perlu memberi tumpuan kepada pembangunan ekonomi, peningkatan budaya ilmu, kemahiran serta keterampilan kecerdasan buatan (AI) supaya rakyat tidak ketinggalan.

“Saya baru kembali dari Emiriah Arab Bersatu (UAE), Davos (Switzerland), suatu hal yang mengesankan dunia sekarang, walaupun dengan pelbagai recah dan rancam politik, Malaysia perlu menumpukan kepada soal ekonomi, soal peningkatan budaya ilmu, kemahiran, keterampilan, AI (kecerdasan buatan).

“Jadi kita mohon rakyat fokus dalam bidang itu dan jika tidak berbuat demikian, kita akan ketinggalan, tambahan sekarang ini dengan dasar-dasar Amerika Syarikat (AS) yang tidak menentu, kita harus bina kekuatan dalaman,” katanya.

Terdahulu, Perdana Menteri meluangkan masa untuk menikmati makan tengah hari di Anjung Dengkil, sebelum berjalan kaki kira-kira 300 meter ke Pusat Islam UiTM Kampus Dengkil untuk menunaikan solat Jumaat bersama pelajar dan jemaah di situ.

Yang turut hadir Ketua Setiausaha Negara (KSN), Tan Sri Shamsul Azri Abu Bakar dan Timbalan Menteri Pendidikan Tinggi, Datuk Mustapha Salmud.

Anwar berkata, dasar-dasar Amerika Syarikat yang tidak merihenti ketika ini menjadikan pembinaan kekuatan dalaman

negara sesuatu yang mendesak dan asas.

Beliau berkata, dalam keadaan dunia yang mencabar dan penuh persaingan kini, rakyat mesti digerakkan untuk memiliki semangat bagi mengangkat martabat negara dan bangsa.

Masa sama, Perdana Menteri menekankan kepentingan memperkukuh semula hubungan dalam ASEAN sebagai kekuatan serantau, selain berusaha memastikan dasar negara dapat dijelaskan dengan tuntas kepada rakyat.

“Kekuatan dalaman itu bagi saya sangat mendesak, sangat asasi,” katanya.

Lawatan rasmi Perdana Menteri ke UAE dan Davos baru-baru ini menyaksikan pembabitan Malaysia dalam perbincangan dan inisiatif antarabangsa yang memberi fokus kepada cabaran ekonomi, teknologi, dan geopolitik dunia.



Pembangunan negara dalam pelbagai aspek penting bagi menghadapi cabaran serta ketidakpastian global.

(Foto hiasan)